

四庫全書

集部

欽定四庫全書

集部

御定歷代賦彙卷四十八

詳校官檢討<sub>臣</sub>劉 炳

主事銜<sub>臣</sub>徐以坤覆勘

總校官編修<sub>臣</sub>王燕緒

校對官中書<sub>臣</sub>嵇承志

謄錄監生<sub>臣</sub>胡宗高

欽定四庫全書

御定歷代賦彙卷四十八

典禮

大禮慶成賦

宋張耒

惟宋六世皇帝踐祚之七年所以和同天人綏靜中外  
垂鴻鬯裕增高累厚以對神祇祖考者固已蒙被充塞  
光融翕赫六合一意四海一口無得而言矣粵以壬申  
之仲冬將有事於南郊乃詔列位恪職賦事而有司建

言惟我國家因時施禮郊丘之位天地咸在牲幣並薦  
禮樂合舉而古者乃以陰陽之至即南北之郊別位殊  
時薦獻異數有司其何從於是天子惕然深思祇畏敬  
戒曰茲大事我其敢專羣公卿士典禮之官竭思和會  
以訂不易於是議者曰先王齊明以享帝而帝之享否  
雖聖人未由知之惟受福者其享之占也恭惟國家合  
祭天地於茲六世矣惟我太祖躬膺駿命以遏亂畧堂  
皇二儀拓落八極以定萬世之業太宗威定於內震蕩

大鹵以一九有定天下於一尊真宗熙洽富盛符瑞委  
積南牧之獠不戰請命威加北荒奏功岱宗仁宗席安  
據厚不動指顧孽獠羗含毒內向吏士未頻藏竄屈  
伏終始太平垂五十年英宗入纂百姓與能神考有為  
六服承德此可謂受天地之福矣然則神祇之安吾享  
也其久哉於是天子乃翳青雲之屋乘雕玉之輿應龍  
受轡招搖翼輶建虹蜺之修竿兮颺彗星之飛游太一  
執節以先驅兮二十八星拱手布武經營而周流貔貅

六師雷霆萬乘初海沸而雲湧忽山峙而川靜蓋天子粹然玉溫健然天運望宮門而動色願執策而命進惟烜赫之靈源兮寶鼻祖於神明覽光德而來降兮館玉宇之嚴清張咸英之廣樂備千籥之盛舞景光交徹鸞鶴下神嬉靈豫醉爵俎翼翼清廟觀德之宮七聖在天時降於宗世有哲孫豈弟無疆惠我文人瞻祖祏而念功兮願禰室而感親聖考油然發中兮在位望而含辛霽暘告旦祥飆掠塵從我髦士來祗精裡御史肅吏司

馬飭兵既逶逶遲遲雲流而日行兮又洶洶業業海運  
而天聲靈旗沛洪翕赫歟霍兮攫拏龍虎而亂鯢鵬雄  
驚懾威而震伏兮柔良化禮而肅清弛威弧戢天戈兮  
固已熄滅蚩尤而折櫓槍執飛廉圍商羊屬之有司兮  
羲和磨刮披拂盡獻其光明蓋傾都空閭翹首跂足俯  
窺履綦傍覩佩玉者忽焉不知手之加顙口之成祝也  
於是背都城望帷宮郊垌且其迤邐兮場圃既寒而畢  
功頽青雲以連屬粲虹霓之經緯紫微下屬於兩觀勾

陳錯施於萬雉扶傾之神仰立而拱翔德之龍下抱而  
曳疑神變之歟成兮涌九地而出峙連廡千柱廣殿萬  
棧飛甍闢桶洞牖屹壁酸股之隅眩目之極唐洛執算  
而莫計班倭操斤而自惑者類非資材於斷塹而皆機  
杼之紡績也一室之用足以溫一家一宮之費何啻衣  
一國驚霆之蹕既震洶壑之聲咸寂寢之靜深兮何清  
虛而邃密天子方端而虛儼而一多儀未舉精意已塞  
甲夜始晦嚴鼓載作飛斂走伏神驚鬼愕望騰精以燭



宵兮玄冥收威而布德靈鼉五震軫車將中天子乃被  
袞執玉兮齊明莊栗之誠動於進趨表於形容千燎具  
揚萬炬畢融上掩熒惑旁爍燭龍近為朝暘遠為融風  
赫赫曦曦煌煌輝輝列次之士野屯之師歸如酌醇醪  
而御兼衣黃流汪洋壁玉照徹祥祲衡布協氣下浹音  
為樂和形為人悅白質之獸蕭聲之鳥紛披雜沓應奏  
而舞節陟降既周燎煙始升奔星走虹奉璧薦牲豐隆  
奔馳而仰驚兮祝融焜煌而上征開闔闔兮闢青都后

帝燕兮百神愉圓錫蓋兮方獻輿岳輸固兮溟効濡於  
是禮備樂成整車而旋萬類環極端門闕天賞出千庾  
恩流百川北包大壤南盡島蠻西越流沙東窮海隅令  
未脫口雷運風傳野無窮人獄無宿愆破械解縲負帛  
囊錢車反其舍士復其位効技呈才千鈺萬鼓天子舉  
酒以屬羣公咸曰休哉天子之功系曰於穆聖王建皇  
極兮嚴恭精禋帝來格兮柔祗並位儼牲璧兮文祖右  
坐臨有赫兮於惟祖宗有常則兮諱兵畏刑後貨食兮

政有損益茲不易兮帝則鑒之戩穀錫兮兢兢業業日  
一日兮三載一祀年萬億兮

元符南郊大禮賦

宋 劉 弇

粵若溟滓鴻濛之始登魚奠獸肇豺獮之知圓顧方趾  
厥協精純肅專於是乎有祭及稽諸載籍則郊之禮尚  
已傳曰帝王莫大乎承天記曰惟聖人為能饗帝以其  
祖配則七代之所更立如指諸掌者蓋明乎郊社之義  
虞夏商周胚胎前芳鯀冥嚳黃用詔於後厥惟舊哉及

陋者為之則誣天贅祖神馭雜擾其語弗經見搢紳者  
不道九天太一三一八神則方士之說試黃蛇白帝陳  
寶鳴雞則秦餘之祀舉或龍馬寓木或待我而五或遙  
拜竹宮或偃予旁午故漢三十年間天地之祀五徙而  
稚圭之徒罷去四百七十餘所有唐末造闕漏莽鹵殆  
不足數是則數千百載寂寥無詔之濶典誠有待乎我  
宋七世彌文之真主矣昔者五季不綱蕩去典制遇民  
則雍氏刈草置國則累碁十二雪桃薦屨顛倒本末飲

羊璞鼠庾膺竈真威鶴列者羞縣莖笑章甫者高惠文  
翼飛虎使婪食冠沐猴使搢紳慄慄遺黎沸糜擾雲柴  
薪燔之弗嗣丘故園而益泯凡時君惡其害已也十去  
八九而先王所以揭虔妥靈者其間僅存雖有天成長  
興之祀圖固已惛悞趑趑翦翦焉獨奚補吾世之討論  
哉我藝祖之初也皇武奮張拱揖宅師奠九厘而業萬  
世支傾柱而紐絕維道籠德絡藥瘵砭疲於斯時也武  
而未熙太宗熙文僕我景命汾晉江吳以次係頸去鼠

箒之苛後茹黃之諍於斯時也熙而未定維真底綏謐  
寧貯祥儲休汾睢云亭於斯時也定而未成然猶一祖  
二宗或五或三嚴配昭升徃遵於南曰仁曰英承憲履  
繩乾酬坤荅轂不及停爰迨神考基命宥密釐正丕誕  
無文咸秩剝倬陋典蓮葩獨飛蕤而造質上咸五而下  
登三墳作四而籍言七更載十九上儀越軼則有元豐  
之祀典存焉及陛下繼之也履紹聖躋元符贊夏子觀  
唐虞童劉李廝魏吳埽攢蠹如殫瘞開夷軌乎破觚臬

後夔前履錯珮摩洗渭巢箕來游來歌懟往者易頑顏  
而鑿方心跼新者飫淡泊而醒醇和摩同穎之秀而穀  
人腹沐塗旁之枝而桑者衣霜顛卒齒而不兵黃吻嘯  
傳而裸嬉衰衣短後羽襦祗裊陶冶於既醉風胎雨驚  
灌莽芭莨長懋乎由儀雞犬之聲相聞鳥鵲之巢可窺  
若乃史不絕書則甘醴歲滴華滋霄零奔精標南而照  
老榮波醜曲以薦清緇文黃輝素烏朱英四肩九尾不  
可殫名衆來致福則髻首鍍耳之俗頭飛鼻飲之鄉濮

鉞僭卧之首長戴斗蠓蠓之名王解辨削衽踵係乎職  
方然猶雍上久虛傳國壽昌之王刻譙赫申旦下貫不  
揜之景光仙驥儷翼於武夷駢竹笨箏於豫章是謂應  
期紹至不特創見豈徒諸福之物可致之祥也邪聖上  
則攬龐禧初嬰然諏挹損採撫謙休哉孰為此者我則  
歸賴於天於是條頌祇之書下發中之詔天姥之日練  
掌故之儀草即是歲之冬至將有事乎南郊之兆禮也  
先是齋宮僅存翼以縵城有司弗虔挂頽支傾天啓人



基厥營瑞誠觀夫端誠之成也司空亢徒太史揆星審  
曲面勢匠人是經爾乃計工倅課匠石順陰陽衆材度  
霰屑雨沛聲山噎壑協庶民之子來歡百堵之皆作於  
是桴木姑繇之墟薦烏苑蓬之巔負瑤光而捫太一走  
神皋而瞰綺阡飛馱軒軒而鵲起脩梁亘空而虹蜿左  
平右城青瑣綺䟽的皪連蜷承阿結隅叢芝栢與繡淩  
燿賦白而駢朱銜環躍楯干詭萬殊豈惟仙靈雲氣倩  
練而霍靡厥有飛廉翁仲矚睽而睢盱其前則崛起秦

裡瞰臨朱垠象嶢闕之中天疑徙居於化人其後則崇  
墉屹屹配以拱極嘉德中豁揭之金勒承和迎禧左右  
迭掖告虔則寅明東峙表事則肅成西直銅題鈿砌徼  
道外周扶拱棲櫨陽烏陰蚪狀鬼峨而建業吁欲擲其  
中留然而高廟嚴除窸窣靚深舒紫蔭之弈弈眴清思  
而惜惜卷皇明於寂照攝睿念於幽襟於此而䟽淪淩  
雪則見其所為齋者於此而觀天地萬物之復則履新  
陽於故陰於此而朝羣臣則壯萬乘而取威重於此而

申懿鑠則有嘉德而無違心是謂一舉而四善得豈比  
夫子雲甘泉窮物怪而誇麗淫者哉然後前期七日受  
誓戒飾戎容命掌次使設邸詔封人使嬪宮請中嚴而  
奏外辦毋不恪以彙臣工款原廟而朝祔室龜食墨而  
吾從是日也改天步仗黃麾服大裘翳華芝巾玉輅駟  
秀騏換清旂旅飲飛平盤廊以獲畧兮緼帶颯而歲蕤  
絢綢杠之子子兮右闔戟而左青旂百神警而陪衛兮  
千官儼以禱褫於是雲罕啓行憶弩射私褊稍星羅柯

舒鱗差鳥號夏服星鐫月弦跳盪號闕震震闐闐塵不  
漸軻委如注川初逗隘而取寬俄舉中而包偏清蹕曳  
聲而肅譁班斂疎飾以陸離鼻獸獻馴而雅拜天驥睨  
雲而嚼羈黃道端以綢直兮下朱雀迤南薰物色別之  
五衣兮翕焉綺錯霍焉霞分貫裂闕以靡旃兮哄閭闔  
而噫輪詰蚩尤使當兵兮戒雨師使清道坐波涌而燎  
揚兮默霆吞而鯨宵岌簸丘而跳巒兮悅神騰而鬼趨  
辰十二以效時兮車抗指而司方蓬勃鬱翳蹂以戢疊

兮半岸叱綽沛以相羊騰蛇白澤詰呵神姦兮挑弧棘  
矢攘却不祥決旬始而埽攬搶兮飛蒙茸而走陸梁爾  
乃賁諸之儔拗怒立發跋扈睚眦陰伺微察鏤朱涅墨  
裂眚直髮當之者糜碎過之者氣奪曾徒手之不抗況  
臂弘而腰鐵於是乘輿之至端誠也適晡焉然後金吾  
誰何挈壺警昏雞人叫巾車而呼旦太宰眠被濯之前  
陳物告備攢題揭寔蒼壁豆登設器陶匏席藁結牲孔  
時酒醴潔時也天形束磬萬籟寂絕玉繩低隅而黏波

霜華飛清而漲闕蒼虬蟠閨而不動燭龍噴垺而布藝  
班馬蕭蕭七萃卷石絳紗萬枝扶鑣夾轍烘麟髓與鳳  
膏邈珠還而電掣天子乃步自大次暨小次而須馬左  
延右揖樞臣禮官以引以翌遂造乎壇端柴煙升帝謚  
寫靈斯游下風馬藝祖是配禮無遺者百神受職魚魚  
雅雅將事之臣罔敢不共肅骨嚴顏秩秩顯弁匝首  
以星俯球飾趨而鸞囀若乃堵以備樂磬簫笙錦孤竹  
之管其宮園鐘狎獵後先翠葆崇牙宣和播粹金支秀

華般喬喬以依永貴人聲而登歌以亞以終飲福受祚  
熙事備成燿火斯舉御端誠而大朝會於以篤萬世無  
疆之祐於是屬車改轅先驅復路乾熙坤恬協泰齊豫  
䟽祥颯而舒徐翦游雲而布濩奪騁目而醉夸心抃藪  
足而蹌林羽千乘萬騎不暘而暄望彷彿以依約至徘徊  
而蟬聯霓衣差綵以暗地雲韶紆聲而撲鄧車轍馬  
跡無取獨謠白雲之穆滿驂龍駕鳳尚陋按行蓬萊之  
列仙上乃御應門弛金科天德貺百福荷鏗萬石考靈

翼奏隆安協猗那皇心懌賜顏色揭雞竿繫囚釋堯言  
布漸動植翔仁風滂睿澤紬繹祀典攬蒐潛德興滅繼  
絕蠲逋已責徧存問乎高年秩牛酒與束帛於是歡呼  
之聲沸渭鏘洋億庶千官環瞻赭黃慰若大旱之望雲  
霓榮若湛露之晞朝陽快若庶鳥之宗鵬鸞竦若衆山  
之景嵩常也今夫施洪者報斯腴德茂者禮逾文其事  
則丘上帝而廟祖考其教則尊尊所以為義親親所以  
為仁然而博碩肥腍亦或吐諸則貴德不貴物齋戒沐



浴有取乎耳則在誠不在人豐蔭省則大饗不足以大  
旅牛慙禴則東鄰不如西鄰此固元符所以材兆物瑩  
吾民時斟酌攣精真陋前代而講嚴禋也頃歲宗祀明  
堂格於蒼昊裒對神考既往之聖孝也間者爰兆北郊  
媪神是報以須敬造方來之順道也今又睹夫端誠之  
宕宕搶空跋躡方地此而天則擁和纏休實神明之所  
相勞非曠古盛德效邪茲亦羸國削君冗儀細藻羌不  
可得而匹紹也且夫留滯周南馬談則沒有餘恚當君

而譽堯舜亦將生之所深恥正得春而不夸信寔艷頑  
菱而已矣況若小臣親陪祠祀苟蟄吭而固毫持此將  
復誰諉不其鄙歟敢拜手稽首而為之頌曰瀕洞蒼莽  
辟元精兮陽司陰覲無臭聲兮契彼自然壇圜成兮百  
聖差軌歎拳擎兮宋更七世邈飛英兮紛綸煥爛賁朱  
垌兮瓊開金閣踴端誠兮蹂漢轡唐奄上征兮帝謚肅  
將臻百靈兮倬彼慶霄薦清明兮於焉降格若見情兮  
自時厥後福岡陵兮若之風雨妥日星兮臣夷妾狄寢

五兵兮疇蟠瓏紫稼抵京兮顯允天子我民寧兮於萬  
斯年揭鴻名兮

壬申歲南郊大禮慶成賦

宋程珌

皇帝御寓十有九載與今為再見於上帝惟王者父天  
母地尊祖配天顧已䟽於三歲矧克脩於十年我藝祖  
之膺圖秉籙也道冒六合功該八埏儒臣風咨合饗載  
嚴破前王之陋揭來世之先前期裸鬯至日潔蠲於穆  
大宗重華比隆歲元叶吉二祖並崇列聖揚休是則是

共感生配祀火正奉祠興國顯太一之祐咸平昭五帝  
之宜燭耀皇文森羅帝儀炎祚中興熙事孔明偉上聖  
之繼照顯睿德之升聞中更孽臣胡然弄兵櫓槍搖空  
戈鋌滿地宮而不郊禮廢以墜倬彼元臣運膺泰亨天  
子善任英明不疑和氣充塞扞蹈布野年穀豐衍災沴  
消伏日月燭乎幽衢雷雨灑乎冤胥爾元老兮以蒲為  
輪爾雋髦兮復招以旌拔偏裨兮人自期於衛霍之列  
秉圭符兮家不遜於龔黃之名日月功兮課中才之士

拘攣脫兮待非常之英鬱然龍翔油然霧蒸用能包藏  
之姦天發其索干紀之夫神趣其縛豈曰無幣乎今泉  
流豈曰無粟兮今紅稠稱鈞衡兮物不頗解琴瑟兮聲  
惟和天子曰嘻爾相之力元臣拜手我后之德天子不  
居薦之上帝乃稽玉歷乃練上日歲祀之申日至之辰  
先成乎民乃及乎神奉牲以進博大以碩奉粢以登有  
芬其苾祝無媿辭天其饗必時也絳闕天低宮壺漏遲  
六龍雷動千官影隨原廟先謁圓丘載祗奠奉雲陽之

璧瑞陳宗伯之珪露凝冰簋雲飛寶彝虞夏歲壘酒  
象醴肅肅乎觚壇之靜洋洋乎英莖之遺龍章兮袞煇  
玉采兮旒垂天容兮雍愉天步兮委蛇臣工巍峨環佩  
參差玉鱗金貌燔燎煙霏神光若交對越靡違永言配  
命流慶丕基禮成樂諧人神以熙宗卿奏畢殿監授衣  
已乃輅車繁纓龍旗日昇清蹕警嶽周廬撤星登龍翳  
芝蛟螭螭騰鸞駢豹尾黃鉞金鉦月卿按節九軌塵清  
乃御端門乃宣翼澤陰山瀚海香無垠域頌聲滂洋流

祉融液此人之和也六花先紛前星澄彩寒氣霽嚴晴  
光散靄數點灑空適當肆沛此天之和也天人並和歷  
數無疆天子萬壽元臣作朋靈監觀下方外慰寧荅天  
洪休宣烈斯人並彊不急吾相吾君丕休哉唐虞鳴和  
明良載歌惟唐有臣亦賦南郊矧我朝文學成林鋪烈  
揚芬寧遜昔人望雲章之王冊想翠鸞之芳塵是用作  
歌憲世千億宣之樂章刻之金石

郊祀賦

元  
傅與礪

惟至順壬申十月之吉大臣既奉明詔祇嗣皇承天命  
率舊章雲合九族日臨萬方紹丕基於既遠衍休運於  
無疆乃稽典籍陳禋祀戒有司飭行事謀泰龜以時日  
薦純牡於天地於是春官議禮庶職效能考壇墀於陽  
位辟氛埃使清明垣繚丘而規合石緜砌而方平組帷  
續其綺錯氈邸翼以相承洞百靈以趨走齊二氣與降  
升犧牲既成粢盛告潔赤精台陽遂之火素液注方諸  
之月黃琮掩藹而霞潤蒼壁泓涵而冰徹是皆將以表



至通明靈罔不因清濁以辨位仿方圓而成形也皇帝  
方以春秋鼎盛肆命重臣攝行大典載弁星羅飄裾霧  
卷對越上下潛交幽顯儼臨壇而翼翼躬服事以勉勉  
凡百多士亦肅且和駿奔就列佩玉委蛇御史執法曰  
糾其儀端白簡以山立鐵柱冠其嵯峨於時萬境凝淨  
羣聲闕寥星翳翳以沈漢斗遲遲其轉杓樂舉兮應律  
煙登兮干霄天門開兮紛照耀靈之旗兮下飄飄般縱  
縱以振霧芳菲菲而揚飈爾乃酌以玄醴藉以白茅三

解送進八音不淆蜺龍天矯於寶簾威鳳翩聯於雲旂  
祥光煜以浮宇景氣郁其覆郊禮言備神具醉揚空歌  
旋靈旆神之來兮陰陽會神之去兮福祿萃昌皇祚兮  
彌億年世修祀兮永弗替籩豆既撤百僚降止工祝將  
胙致嘏於天子浩浩乎洋洋乎莫不鼓舞元化泳涵恩  
波用昭明於靈貺咸稽首而作歌歌曰帝承天休膺大  
寶兮燔柴於郊假穹昊兮慶雲下流被百草兮羣黎熙  
熙安以老兮崇德罔休以永保兮

郊禋賦

明 鄒德溥

伊方儀之博厚兮統玄形而承天苞萬彙以函載兮德  
上配乎重元維曜靈躔於陸南兮伯趙呼景風其應序  
帝將乘離而大報兮駕之方澤乎奠秬於是使馮相歷  
日兮司樂宿懸奉常傳戒兮掌次張璫秩宗條頌祇之  
書兮太宰總揚職之警蹕人共玉璽之飾兮司膳奉齒  
栗之省帝服皮弁而誓戒兮又蒸蘭芳以發咨穆然淨  
齋心於宿設兮儼若瞻乎柔祇詔飛廉使清塵兮敕豐

隆以灑道前望舒而後鈎陳兮益之以蚩尤其秉森司  
塗汜埽以新衢兮田燭耀而如星雞人呼晨以叫百官  
兮巾車應而鳴鈴於是升金軒兮撫天僕揚六鑾兮齊  
八駟璇蓋參麗以雲浮兮太常膠臘以電燭扈帶鮫函  
兮旁轂六軍袍服兮駢行重英曲瑤翕以赫兮雲罕激  
燿火而納光騎轟騰而駢隱兮夫何馭遺風而追電也  
倏習霍而班泰圻兮百靈蓋汎榮以竚奠也帝乃服大  
裘之雪煜兮秉鎮圭而如璫握鸞刀以啓臂兮奠黃琮

以為儀犢與繒往往象色兮圭兩邸以從數奏太簇而  
歌應鍾兮又綴以咸池之舞琴瑟材之以空桑兮管絲  
竹而鼓靈鼗藁秸蒲以藉席兮薦菹醢以陶匏朝踐酌  
泛齊於瓦甌兮宗伯攝而獻醴饋食申之以盞齊兮又  
亞以匏爵之醕次泛與醕其更獻兮歷沈齊而七之樂  
繽紛其迭奏兮恍焄蒿兮在茲洪臺崛其獨隆兮瓏交  
䟽而金耀鵠翔虛以迷影兮忽不知其酷肖折薜荔以  
為脯兮羅杜蘅以為綵紛吾既備此芬芳兮泣痊罔而

薦犧召天孫於石閭兮呼海若乎巨壑起天吳與陽侯  
兮縶雲陽而徧索曰爾膚功之在民兮罄埏埴而胥懷  
予既奄有此廣輪兮茲用修報乎瘞埋眺濮鈇而盼祝  
栗兮延佇乎邠國與泰遠庶搏搏總總以來馨兮鑒予  
心之繾綣於是地垠開兮揚景輝來八極兮臨方扉飲  
明水之清泠兮嘗黜牲之腍肥祝融穆而肅侍兮恍若  
萬仞寵從而干雲靈胥澹以中停兮又似乎重溟澈澹  
而沃日石麟夭矯兮團翠煙而率舞羣鳳誰喈兮依清

風而和律瑞蜿蜒於越席兮祥光熠乎金根既薦享而  
畢事兮乃斂昭華而迴軒梁既成兮神具佑羣鶴留兮  
獲異獸雲靈贄兮雨滂沱懋百福兮錫萬壽辭曰我我  
方丘隱崑崙兮肇裡嚴祀萬乘屯兮衝牙錚鎗泛大樽  
兮聖心穆穆嚴邃密兮樂奏八闕地祇出兮神光剌剌  
福祿植兮繼繼繩繩千萬億兮

郊裡賦

明  
楊元梓

帝秉圖而御宇兮翔仁風於一紀坤軸奠而常寧兮泰

階平而若砥嘉禾連畛以鋪芬兮甘泉湧而若醴西棘  
納賁於白環兮東滹移珍於楛矢洵閭澤之遐暢兮乃  
聖心虛而弗恃曰惟玄功之默佑兮俾予一人以臻上  
理秉宿心而告虔兮展明禋於返始既觴享於蒼郊兮  
復薦鬯於玄趾惟闕逢之馭歲兮望舒亦亘於敦牂律  
方應於蕤賓兮正大火之當陽旦初麗於蒼龍兮昏玄  
武以為房景風煽於南陸兮旭日高標於穹蒼乃命羣  
僚以稽舊典兮將紹虞夏而繼皇唐大卜奉龜而揆吉



兮宗伯秩祀而陳常關陰澤而展玄郊兮將致禮乎地  
皇屬靈辰之既屆兮筮吉日其惟辛雞人徹漏而送曉  
兮初日上而如輪攝豐隆使御駕兮命雨師以清塵六  
玉蚪以扶輅兮鳴八鸞之振振抗蜺旌之葳蕤兮曳虹  
旂之繽紛朱鳥晃朗而錯映兮犀甲雜遝而嶙峋屯干  
輅以霆轉兮羅萬騎而星陳赫皇儀之孔肅兮瞻泰圻  
之咫尺總七萃以連鑣兮齊九旂而按筴炎炎焱焱以  
先後兮不踰時而至乎方澤惟皇精寅以肅穆兮躬孝

享而永神休被九章之赤黻兮垂十二之冕旒瑞玉珎  
以告虔兮御葩瑤之大裘寶山壘以薦酒兮援有卽之  
二球與明水以表潔兮用陶匏以象之升方鼎以陳羞  
兮縮白茅以藉之歆黃琮之甫薦兮鐘鼓鏗鐃而交振  
太簇奏而雪飛兮應鐘歌而風迅戛雲和之寶瑟兮吟  
孤竹之清韻舞咸池而容與兮三犧五牲而迭進肆瘞  
禮之告成兮展緹帷而返旆引太常之朱旂兮迴夷庚  
之翠蓋迨旋馭於九重兮瞻祥光之霽霽惟閭闔之晨

開兮百辟嵩呼而虎拜曰惟坤元之資生兮共乾元而  
交泰后函三而為一兮湛恩旁流於無外矧遜美而弗  
居兮曰化工之是賴宜純嘏之敷錫兮誓河山而礪帶  
陳夏諺而續衢歌兮托鼓缶於天籟頌曰漫漫方輿配  
乾象兮含弘光大萬物養兮有赫北郊洪以敞兮惟帝  
嚴恭昭殷享兮神之格思垂靈爽兮巍巍皇圖配地廣  
兮

大祀圜丘賦 有序

明 廖道南

嘉靖庚寅十一月丁未上御齋宮裡祀昊天上帝於圜丘臣道南奏賦疏曰伏考洪武四年十一月丙辰我聖祖高皇帝祀昊天上帝於圜丘諭羣臣曰帝王奉天以君臨兆民當盡事天之道今朕以冬至祀圜丘夏至祀方澤以報覆載之大德惟夙夜寅畏冀精白昭格庶陰陽和風雨時以福斯民五年十一月辛酉祀圜丘禮成於時儒臣咸為歌頌宋濂序曰皇上據禮經洗千古之陋每歲親升泰壇昭事上帝恪恭寅畏有赫其臨陰敘

陽舒降甘風雨覃及寰宇物無疵癘聲歌之發非其時  
乎八年冬至天降甘露於圜丘聖祖親製為論命儒臣  
各詠其事以彰厥美至十年觀心亭成聖祖復命宋濂  
記之臣嘗莊誦竊嘆以為我聖祖之垂諭於下也惟以  
格天福民為念而當時儒臣之納忠於上也惟以順時  
澤物為言視唐虞之都兪寓警戒於賡歌商周之雅頌  
存敬畏於祝願其道一而已矣恭惟皇上體法聖祖光  
復圜丘之舊制祇承大報之盛典聿興禮樂允協神人

甘露風降於往時靈雪應期於邇歲嘉禾秀麥疊見禎  
祥雲慶河清薦形歌頌是故天心歆豫人心懽忭固有  
徵矣然上天以好生為心人君以大生為德易大有之  
象曰火在天上大有君子以遏惡揚善順天休命无妄  
之象曰天下雷行物與无妄先王以茂對時育萬物咸  
之象曰天地感而萬物化生聖人感人心而天下和平  
泰之象曰天地交泰后以裁成天地之道輔相天地之  
宜以左右民今天下疲癯困苦之民與夫遷謫悔悟之

臣數窮理極陰剝陽復此其時也皇上憲天聰明體天發育值茲陽長之候渙頒仁覆之恩建中致和以孚大有之義體信達順以推无妄之誠感山澤之咸而膏澤遍敷於四海交陰陽之泰而協氣克暢於兩間中庸所謂致中和天地位焉萬物育焉邦其永孚於休矣臣荷蒙聖明簡列侍從執經講殿仰知帝學之淵源珥筆詞垣快覩宸章之炳耀惟天為大煥乎其有堯文如日之升允矣其躋湯敬臣職專紀載喜溢揄揚茲遇郊禋精

意之時上獻聖德純誠之頌昔宋臣范鎮有大報天賦  
宋祁鄭獬有圜丘賦乃倣其體裁繹其名義謹撰大祀  
圜丘賦賦曰

大矣哉乾元之至神也混沌未分太極涵乎真精闔闢  
既形至化運乎神明於是乎二氣凝四象著五行順三  
才具周流六虛而沖漠寥濶曲成萬物而龐博淳裕是  
故明明在上帝宰命以覆羣生赫赫在下君建極以牧  
萬民儀而式之亶無聲而無臭化而裁之寔並育而並



行粵稽諸古代作神聖義農履元軒轅麗正堯欽若以  
授時舜時幾以敕命禹惠迪以敘功湯昭格以躋敬文  
緝熙以順則武祗承以執競是故其事天也或則圖推  
策以觀玄化或被袞垂旒以象蒼昊或洗心滌德以將  
明馨或報本反始以彰靈造蓋圜丘之祀與天同體誠  
悠久而無疆命於穆而不已遐哉邈矣其所由來者遠  
矣我聖祖高皇帝首握真符肇建圜丘於中都時則月  
壁星珠樹駿業而訏鴻圖暨定丕基載建圜丘於南畿

時則海潤雲輝革虎變而乾龍飛追我皇上敬天法祖  
執一御萬超三邁五出震繼離以申異命履恒昭賁以  
開泰宇乃歲上章貞於攝提月臨孟陬日會姬甯皇上  
淵衷默契睿思先知昭告皇祖穆卜泰著協靈龜之攸  
吉測顯象之咸宜乃稽彝典發明綸下疇咨旁周詢天  
章燦爛而星斗輝宸藻溫潤而雲雷屯於時親而宗藩  
貴而勲戚近而六卿庶而百辟內而黔黎外而蠻貊罔  
不通觀厥成允承休德胥與覲耿光而揚大烈也乃於

仲夏日之方中律旋蕤賓令屬祝融皇上致其精誠達  
於昊穹乃命宗伯乃召司空諏良辰以爰始擇吉土之  
是崇乃啓郊壇詣天門闢九道循三垣土圭測景而正  
方位水臬定勢而登平原於是封人畫疆匠人營域山  
虞掄材土方辨脉羅氏芟草柞氏攻木罔不悅以趨事  
勤以効役胥與贊皇謨而宣帝力也乃於仲冬月之旣  
朔大工告成輿情咸樂皇上夙興恭視益秉虔恪乃駕  
鸞輅乃次龍幄步台階以周旋瞻泰時之遼邈乃陟太

微謁上玄躡黃道凌丹躔於時曙旭熹微祥煙晻霭文  
列鸛班武聯虎隊萬旅忻躍兆民懽戴罔不合辭稱慶  
同心興愛胥與頌成功而歌昭代也是故以言乎其為  
制也其內則三成切雲九陛干霄四門闔闔兩墻迢遙  
爰有雕玉為欄綺石為阼碧瑤為砌玄礪為城南箕北  
斗而魄寶華西奎東壁而瑤樞麗其外則神庫閼恤神  
廚整潔天池翕浚天井清冽爰有篝燈之臺望燎之爐  
宰牲之所條器之區涼飈披拂而陰幽潛佳氣蔥蔚而

陽明乎是故以言乎其為位也天帝端嚴宸極正中神  
牀嚴肅御案豐隆爰有皇祖配位龍椅交張臨之在前  
質之在旁洪功俊偉而放勳齊峻德廣運而重華光其  
次則大明朝暎王宮北東夜明夕魄冰鑑懸空爰有經  
星緯星周天在茲雲師雨師風伯雷師九虛緜眇而霞  
馭翔萬靈翕合而颿車馳是故以言乎其為禮也其器  
則蒼壁瑩澤玄酒澄清帛出素絲爵蘊玄英爰有太尊  
著尊山罍犧尊太牢少牢太羹和羹質用陶匏而古制

存藉用藁秸而淳風形其節則太常贊禮太祝宣詞典  
瑞捧玉典祀陳儀爰有鬱人薦鬯幕人張帷司烜取燧  
司尊奠彝駿奔對越而精意歆升降拱揖而矩度宜是  
故以言乎其為樂也其器則玉斯編磬金斯編鐘杙敔  
斯木琴瑟斯桐爰有搏拊鞀鼓簫管塤箎干戚舞佾羽  
籥文麾龍筦偕鳴而六變格鳳笙迭奏而九成儀其節  
則黃鍾乾父林鍾坤母子已陽律午亥陰呂爰有清宮  
清角清羽清商韻諧雲門氣應星房天樂鈞韶而清籟

發地雷奮豫而元聲揚猗歟盛哉我皇上之受命於皇  
天也純粹天性剛健天行含宏寬裕而體元以敦仁者  
如春之生齊莊寅畏而嘉會以崇禮者如夏之亨弘毅  
嚴重而濟物以由義者如秋之成淵微宥密而貞固以  
建功者如冬之貞沛乎其優渥而兆民被其澤也如雨  
露之恩赫乎其震肅而四夷服其威也如雷霆之聲卓  
乎其中正而萬世以為法也如二曜之明煥乎其炫耀  
而萬國觀其光也如列宿之精我皇上真與昊天為一

道矣昔者黃河清於丁卯慶雲見於庚辰甘露垂於成  
子五星聚於甲申靈雪三白於己丑瑞麥五岐於庚寅  
千祥駢集萬寶畢呈豈恃豐而罔戒寔有大而不矜仰  
參乾運允協皇心謙以保泰約以持盈功以學懋志以  
道寧旰食而日旣昃宵衣而夜嚮晨茲當長至大報中  
升先事而躬習禮儀屆期而特視犧牲致齋而顧諟天  
命禋祀而克享天心肆赦大賚而天德好生慶成大饗  
而天道咸亨是故至誠無息至德無垠至仁無外至治



無形至禮無讓至樂無聲而開我皇明億萬載之太平  
也臣稽首頓首迺言曰於皇皇天萬物之祖峻極高  
明溥博悠久於皇皇祖萬世之師道超今古威震華夷  
皇天眷命皇祖垂祐篤生聖人亶作元后入紹大統首  
正大倫惇典庸禮發政施仁祇復圜丘肇崇殷薦祥開  
台斗光回雲漢禮全大體樂備元聲俯升燔柴仰歆太  
清燕舉慶成上下交泰湛露香凝需雲瑞靄顧茲陽長  
元氣發生陰陽和暢日月貞明大號渙頒對時育物省

役蠲租闡幽宣鬱登崇俊良秩正紀綱百度惟貞四夷  
來王惟德動天惟天監德前星炳耀子孫千億惟孝法  
祖惟祖配天永錫膺祚億萬斯年

恭祀園丘賦

明王梅

猗我明之撫運兮垂十葉而皇皇覃鴻休於八極兮昭  
靈貺於蒼蒼粵聖人其繼作兮飛六龍於湖湘握貞符  
於一紀兮懷百神而有常乃詔祠官乃飭郊壇曰朕心  
之巨疑而陰陽之義欲辨析於毫端顧纓綏之並陳紛

總總而橈橈咨儒碩之據經排羣疑而獨前天子乃正  
同牢之譌誤定大典於不刊罔六合之中孚悉萬靈而  
告虔可謂總條貫於欽明析淆亂於衆言者也歲在壬  
辰冬仲之吉日長至於南郊微陽動於葭室蓋大報之  
宜行而聖心之攸惕銅人執簡當宁有翼屏政潛神崇  
虛主極斂視聽於精裡祓喧阗於百辟如是者三越日  
焉而後金門曙闢袞服晨興法黃虞之格藝祇九廟而  
告勤爾乃振玉輅之殷駢翳華芝之飄搖金貂翼輶錦

校扶輅建螭蚪之羽旂兮拂雲霞之輕綃儼肅靖之前  
導兮舞迴颿而飄飄二十八宿五岳四瀆之旂旗迴環  
矗擁紛不知其幾許兮目瞑眩而相交列黃麾而豹尾  
響儀鎗之玉珰被毳罽兮馴象山回而嶺峙耀障泥兮  
仗馬雲滃而川遙於斯時也豐隆排雲雨師汎灑風伯  
剌然其先驅日馭隨車而散彩方疾雷之轟殷兮繁萬  
乘之初動也俄貔貅之奮武兮伊六師之齊發又何乾  
運之不息兮指重明以麗正也於是踰金水出崇墉望

清都戾帷宮初海運而天聲忽秋肅而春融奉圭且者  
受成於易史列陛楫者屏息於元戎爾乃達觀於郊丘  
也廣矣大矣不可述矣上鬱律而摩鴻濛兮下混龐而  
當地軸外翼騫而雄張兮中深闕而無蹟廣連廡之千  
柱兮繚周垣之相屬眇八觚之直上兮倚青雲而盤矗  
爛蚪霓之天矯兮拂祥飈之回複恍朱鳥之可摘兮謂  
南極之在麓魑魅屏跡而遁藏兮太一勾陳呵護而清  
肅疑神變之倏成兮非人力之所築蓋翹首之久不知

股之戰慄而肌之生粟也義和弛御候人告昏甲夜寂  
寂齋宮沈沈天子方儼而一精而真盥而不薦直內惟  
寅留心於逆釐之事初未嘗天天而申申也既而絳帟  
呼旦靈龜三嚴玄冕戕戕大裘襜褕出自齋宮穆穆登  
壇司烜告期萬炬畢然熒惑逡巡而泯耀祝融忽霍而  
相先太和之鐘厥音維洪鯨吼龍吟殷殷隆隆吉事爰  
始燎煙方通合蕭薌於雩蒸何奔星而走虹闢天闢以  
受祉昭苾芬於璇穹蒼壁秩秩黃流崇崇三陟三降隸

棣雍雍陶匏十二而豐質雲和六變而始終近可追虞  
廷之盛而陋矣非矇瞍之工是宜冥頑之獸瑰譎之鳥  
莫不率舞而噤噤蓋從我髦士駿奔顒顒而列屯野次  
之卒庖翟宰夫之賤迄於竣事而惟恭可以見聖人之  
能享帝而錫羨於無窮大禮既畢乘輿乃旋萬姓環門  
九衢摩肩蓋傾都而塞道咸仰聖而瞻天幼始於髫髻  
而老至於華顛遠而極於離身反踵之渠帥穴居水處  
之蠻蜚竊觀羽儀而側聞車馬不知額加乎手而口頌

乎萬年爾乃推純嘏昭受釐斥大庖開天廚敬奉天之  
弘啓闔百辟而宴之饌珍玉兮芬芳疊瓊漿兮淋漓羌  
三台之接曜紛委珮於彤墀於以見太平之無外而或  
雜乎荒服之蠻夷莫不泳仁而醉德含和而揚簪臣乃  
惑堯天之廣大駭周典之崔嵬初洩洩而融融忽徨徨  
而徊徊有一二者碩顧謂臣曰子豈非蔽席隱茅始脫  
乎戴盆雕蟲守蠹未離乎窺斑者哉烏貴乎觀國之光  
也子少須吾其語子夫聖人之於天也默誠以通顯欽



以將方淵澄而龍見本敬一之惶惶斯誠神而屆遠夫  
何適而不臧蓋將震一索兮得男離兩作兮重光誕主  
器而執壺兮邈宜君而宜王豈止彗消於東井之分兔  
白於蟠龍之岡哉臣俯而拜仰而歎曰大哉精乎信天  
人之如響也遂從而歌之曰於赫我皇作而聖兮有園  
者丘式稽古今紹帝自中福穰穰兮安斯武斯聖復聖  
兮億萬斯年有事於茲丘兮

擬北郊賦

明  
葛曦

帝握圖之一紀鴻號熙以遐宣皇猷屬乎穹昊至德邁  
於深淵四時成序九有安瀾素纓赤莖紛呈奇於川嶽  
兩岐雙穗屢驗瑞於隰原河海振兮不洩華嶽載兮不  
騫亶博厚之效靈配高明而罔愆睠方圓之合德宜分  
祀乎長安制沿隋漢義採譚玄旣升祀以明大報爰埽  
地以奉嚴蠲是月也星臨危度日麗秦分炎帝司令祝  
融炳神節屆長日律應蕤賓鳴蟬鼓翼游北別羣林含  
煙以翳翳華綴露而繽紛善萬物之得時睹神功於坤

元象彼百辟卿士山川百原百縣猶然其秩祀伊茲神  
州厚載磅礴渾淪而可已乎明禋於是太常卜期宗伯  
陳戒協吉日於靈辰致齋明於淵沕設御幄於太極督  
侍衛其嚴隊翕流霞兮飲露英芳瓊枝兮席薜荔五品  
儼其袴褶羣工結其帶珮已乃金吾視壇禮官時邁列  
位次於壇前修樂舞於懸內罇罍篚罍之器燦如星羅  
山川嶽瀆之神紛若雲霓饌帳施兮委蛇黃流注兮沆  
瀣犧牲成兮粢盛潔藁秸設兮迎祖考而作配爾其整

藻絳正紘縱陳鹵簿設宮懸金根宵飭瑤輅朝嚴立戈  
迺夏璫弩重旃羽林森沈以勒騎虎賁肅穆而控弦召  
風伯雨師以除灑驅勾陳蚩尤而靜涓夔魑罔象杳不  
知其所之複道紫宮靄淑氣之澄鮮於是太僕執輿皇  
帝升輅䟽轂飛軫時服設副咸龍旂而繁纓衍蒲梢於  
上路七萃警蹕千牛馳驚天行星陳雲從景附蹶北門  
而東馳屯騎羅而星布鼓吹不鳴諠譁不吐將泰圻乎  
至止望方澤而趨赴帳殿開兮天龍翔帷宮駐兮百神

護已而星河欲曙羣后四朝卿奏質明上易袞袍乃報  
功於陰澤肆展禮乎玄郊遡崑崙以迎神瘞毛血以潛  
交邸兩圭以象數旅四望於清霄奠黃琮兮鎮瑞鼎黜  
牲兮升庖斂檢玉而具瘞琛敦質朴而器陶匏鬱鬯兮  
玉瓚縮酒兮江茅於是太簇奏咸池舞應鍾歌靈鼉鼓  
函鐘為宮兮太簇為角姑洗為徵兮南呂為羽管嶰谷  
之孤竹瑟雲和於湘浦匱聲金而振玉載鼓祝而戛戩  
八變既畢六佾載舉冠華秉翟紆給容與若俯若仰若

來若往飄霓裳於雲衢若翔若行若踈若傾舉仙佩於  
洛渚爰赴度而應聲宛陽阿而激楚其間大官進熟內  
令奠幣侍中承盥黃門獻悅常卿奉玉步以周旋太祝  
持版祝而揚厲有來雍雍無然泄泄列耀秀華凝芳郁  
荔雲黼黻以飾山壘蘭芬芳而浮沈劑川澤滫潏以鴻  
濛丘陵森悠而容裔一人對越允穆穆以皇皇有辟駿  
奔猗蹌蹌而濟濟洞淵微以神交殫精誠以血祭亶明  
德之惟馨宜神祇之篤惠福飲兮秬鬯芬馥昨受兮籩

疊嵬萃肅肅之儀既盡穆穆之禮既行乃返旆於黑時  
遂迴輪乎紫宮叱豐隆使扶輶呼蒙公以當兵車雷震  
而風厲馬鹿超而龍騰天曠朗兮無塵鸞和鳴兮有聲  
絲管啁啾以嘲哢鐘鼓啗噍以呼呶迺至和於五位迎  
純嘏於九重羣望既秩禋禮告成於是禮官奉策而進  
曰國家大事在祀萬物資生在土惟泰元與媪神比慈  
母與嚴父兩儀既分而異位二禮焉合而並舉觀周禮  
司樂之遺制知兩間秩祀之各所汾陰澤中曾起議以

專祀元始漢武胡鍾訛而共簋邇曠典於千年蓋特祀之可數太和魏文建德周武先天唐宗開皇隋祖并宋帝之元豐僅歷世而五主彼其二年一祀固苟簡而非經而此之隨得隨失亦未為百世之懿舉也我皇握符闡珍鋪芬衍鑠修百王之廢墜恢往聖之迷作辨時位順陰陽倣形色別圓方實柴禋燎隆突兀而騰越沈狸醵辜從沈淪以潛藏元祀既稱嘉謨允彰將植華平於春圃豐朱草於中唐諸福之物可致之祥紛綸乎表大



地之福釐霽霽乎昭蒸民之阜康也於都乎休哉天子  
穆然而思道然而喜曰唯唯否否吾聞事神以實不以  
文起禮以義不以制議事以時尚其通敦典以禮審其  
勢我高皇初肇祀於鍾山洪應衍休後合祀於太祀嘉  
禎滋至逮列聖守虞書之肆類固錫羨而隕祉乃世廟  
從周禮之兩郊亦永年而長世苟明信之能至奚擇乎  
澗溪沼沚之毛苟理義之不愆何惜乎壇壝經營之費  
時詘兮慮儀衛錫予之繁難禮繁兮懼乘輿頻出之非

計予將籌大盈之充虛晞元黎之培植省績藻之繁文  
謹明祀之誠意豈止奉遺典而遵修纂前文之陸離已  
哉於是羣臣稽首載拜揚言曰旨哉言乎是蓋景鑠之  
上儀鴻遠之懿志也爰系之以詩曰從從神州曠無垠  
兮求神式廓渺崑崙兮黃玉白禪樸無文兮神之格思  
方澤濱兮聖皇於穆覃真純兮潏洊滲漉浸以深兮感  
招靈貺福釐新兮萬有千歲子孫振兮

迎長日賦

以三王郊禮日  
用夏正為韻

唐 柳宗元

惟饗帝於事天必推策而迎日寅方肇建候啓蟄以展  
儀卯位將初爰用牲而協吉送烈烈之凝氣導遲遲之  
陽律猶分可愛之輝式停寅賓之質稽之虞典期匪疾  
而匪徐行以夏時契惟精而惟一職在馮相事傳小正  
符上春以備儀必修其始先仲春而有事故謂之迎時  
也淑景初延幽陽潛啓當四時之首位用三代之達禮  
探賾索隱得郊祀之元辰極往知來正邦家之大體事  
冠前古儀標後王皮弁乍臨土圭之影猶積泰壇旣罷

玉漏之聲漸長變熙熙之純曜流杲杲之晴光壁彩始融麗景欲凝於城闕輪形尚疾斜暉未駐乎康莊是知迎長日之儀實王心之所共兆南郊之正位乘陽事之所用故可以知上下之分際見天人之交動浮晨光於俎豆散微照於苞茅周流金石暉照陶匏異乎天紀不修泰伯尚矜於泰時日官失職晉侯徒繼乎夏郊於以迎之則無違者委照將久豈三舍之足憑延光可期胡載中之云假自然應以繁祉錫之純嘏禮儀允洽於神

人正朔克周於戎夏今我后再新古禮與天地相參應  
戩穀之宜受之千億奉郊祀之報至於再三然則迎長  
日恭祀事並虞夏而何慙

迎長日賦

以三王郊禮日  
用夏正為韻

唐

李程

氣之至兮景之長郊之初兮國之陽將有事於新日以  
無忘乎舊章太史先期而以告天子齋心而有常且曰  
經紀不忒乃貞明而成象疾徐中度胡躔次而可量俟  
一人天臨而斯出俾羣后景從而有光可以冠千古之

嘉禮軼三代之盛王然後五輅乃駕六龍是驂迎炎精  
表著明於君象就陽位乃展禮於國南斯可以人詠明  
哉且知配虞帝之二工升歌也奚獨美文王之三且天  
有兩曜今日無其匹域有四大兮王居其一將報本而  
郊天因宣明而主日大司徒執圭以表位羣有司奉璋  
而有秩義和御之而有倫疇人則之而無失運行之次  
望遲遲以就陽寅賓之時見杲杲而已出始也戒職司  
明國體卜郊之典無關迎日之義爰啓受命於祖作龜

於禰是皆匪愆於儀未有不謹於禮禮容必呈祀事孔  
明迎扶桑之初乃實柴而薦敬因吉土之兆同埽地而  
貴誠信列辟之盛節俾歷代而作程魏則朝於獻歲夏  
則置乎小正今則聽封人之善祝採從臣之嘉頌時令  
空美於風行帝力孰知其日用人悅於下禮行於郊不  
獨服尚玄素器遵陶匏是知禮之設也教之大者彼孔  
稱從周殷因於夏曾未若我后敬授人時而天錫純嘏

焚柴賦

以報天享日精  
意蠲潔為韻

唐何迥

於穆聖君功高德奧利澤能廣靈祇必禱溢周夏之珍  
符繼三五之徽號順眎心而展禮擇良日而大報所以  
后土祈穀圓丘祭天雍雍濟濟翼翼乾乾建朱干而日  
曜張翠帳而雲懸皇帝嚴法駕而戾止詔羣官而萃旃  
籍白茅以顯若望青壇而伉然我君精潔我后孝享容  
衛翩翻威儀森爽就陽之位斯在薦帝之儀罔失陶匏  
必成牲玉惟栗風伯戒道玄冥司律惟天命子之辰惟  
帝告天之日靈神以之保乂昊穹以之宥密穀核洋溢



鼓鐘鏗鉤三靈同感庶物皆精故祭者修禮之義柴者  
告成之意燎焜煌而上熏煙勃窳而傍駛朝野美乎聖  
澤華夷贊乎能事惠浹洽於煇庖恩汪濊於民吏則知  
柴而致福祭示吉蠲效周室之為理望虞家之有年福  
福應兮飛焰神神來兮駕煙珪組既陳酒醴皆潔繼功  
前王垂裕來哲化成而萬歲無疆禮畢而四方有截諒  
夏郊之義舉媿序能之筆拙

郊特牲賦

以藹栗之微貴  
乎誠慤為韻

唐

韋 充

天實至尊物難致味所以郊祀之展禮惟重犧牲之用  
犢有為故能昭德馨導生氣叶上帝精明之感必因誠  
以告虔示下土恭謹之心有以小而為貴由是選才斯  
始稟命有歸固資於至敬之薦不在乎充身之肥盡黑  
黃蒼赤之形舉書其數用齒角皮毛之狀具體而微苟  
山川之不舍曷天地以相違當其大禮既陳泰壇斯踐  
形殊歸獸角若獨繭羈縻忽至初無悚於肇牽馵馵方  
來終有悲於餘喘肅然之內蠢爾如生委質未分於天

理亡軀終徇於物情足以上祇明命下達精誠乾乾之意不虧因必之於心敬戰戰之儀斯異亦何假於楅衡可以薦明時可以撰吉日天子以之合禮而具備有司用此陳儀而罔失殺身之際雖有補於馨香登俎之時固無慙於榛栗斯可以見至德在斯入用惟時實禮之大者在信以成之介葛雖聞於早辨莊周誠得而興悲是故聖人制禮作樂必資後學分隆殺於輕重之心辨等儀於長短之角彼賓客者滿尺宗廟者盈握曾何足

以表於齋莊固未可以彰其忠愍方今四海既定小信  
咸孚郊天祀地之禮將展博碩肥膾之用奚無所以下  
臣稽首而歌曰惟吾君之德也與天地之巍乎

雍時舉燿火賦

以享神之期候  
此為節為韻


唐

王起

雄雄雍時兮神州之壤赫赫燿火兮橋衡之象所以郊  
祀克明所以照臨是仰成形中度知有要而有倫燭幽  
以時表來顧而來享肇秦帝而有制洎漢皇而不爽伊  
昔克修羣祀大合百神聲明雲集文物星陳仰珠旒則

嚴其待曙聽玉漏則闐然未晨悔威儀之秩秩迷俎豆  
之莘莘張華燈而其光不遠秉神燭而其明不均則雍  
時之舉燿火也莫之與倫旣而亭亭有揭燄燄方爇於  
以觀百里之備於以昭五夜之節拂瑞雲之表乍疑乎  
燭龍方來入靈壇之中又似乎神光不絕由是皚皚炳  
映盞斚鐔彝咸若光而若滅罔顛之而倒之熠燿無替  
熒煌自持在質明而有讓當委照而無私殊太叔之於  
田盤遊是舉異齊侯之設燎朝會為期嘉薦者於焉仰

止執熱者難乎嚮邇電延而自西自東星繁而一彼一  
此比王屋之火空際不流似陳寶之光祠中乍委則雍  
時之義斯焉取斯燿火之作為於有為照苾苾與芬芬  
自明無黷燭蹒蹒與濟濟方表有儀故將崇其明祀立  
我洪規豈徒散孤光於地表燭丹燄於天垂而已哉國  
家祀典式崇舊章必授思宅中而圖大雍時方弘法居  
上而克明燿火斯候足以掩前王之純懿諒介福而何  
究



御定歷代賦彙卷四十八



# 欽定四庫全書

集部

御定歷代賦彙卷

四十九  
五十

詳校官檢討臣劉 烜

主事銜臣徐以坤覆勘

總校官編修

臣

王燕緒

校對官中書

臣

嵇承志

謄錄監生

臣

胡宗高

欽定四庫全書

御定歷代賦彙卷四十九

典禮

河東賦

漢揚雄

伊年暮春將廢后土禮靈祇謁汾陰於東郊因茲以勒  
崇垂鴻發祥隕祉欽若神明者盛哉鑠乎越不可載已  
於是命羣臣齊法服整靈輿迺撫翠鳳之駕六先景之  
乘掉奔星之流旃矍天狼之威弧張耀日之玄旄揚左

纛被雲捎奮電鞭駢雷輜鳴洪鐘建五旂義和司日顏  
倫奉輿風發颿拂神騰鬼趨千乘霆亂萬騎屈橋嘻嘻  
旭旭天地稠數簸丘跳懸湧渭躍涇秦神下誓跼鬼負  
沴河靈嬰踢爪華蹈襄遜臻陰宮穆穆肅肅蹲蹲如也  
靈祇既嚮五位時敘綢繡玄黃將紹厥後於是靈輿安  
步周流容輿以覽乎介山嗟文公而愍推兮勤大禹於  
龍門灑沈菑於豁瀆兮播九河於東瀕發六觀而遙望  
兮聊遊浮以經營樂往昔之遺風兮喜虞氏之所耕瞰

帝唐之蒿高兮睪隆周之大寧汨低回而不能去兮行  
晚垓下與彭城滅南巢之坎坷兮是幽岐之夷平乘翠  
龍而超河兮陟西岳之嶢嶠雲龍龕龕而來迎兮澤滌  
漓而下降鬱蕭條其幽靄兮滄汎沛以豐隆叱風伯於  
南北兮呵雨師於西東參天地而獨立兮廓盪盪其以  
雙遵逝乎歸來以函夏之大漢兮彼何足與比功建乾  
坤之貞兆兮將悉總之以羣龍麗勾芒與驂蓐收兮服  
玄冥及祝融敦衆神使式道兮奮六經以攄頌隄於穆

之緝熙兮過清廟之雖雖軼五帝之遐迹兮躡三皇之高蹤既發軔於平盈兮誰謂路遠而不能從

祀后土賦

唐張餘慶

粵若盛唐勃成天光禮樂克備典謨允臧固以輔轡軒昊跨躡堯湯豚魚信行於寓縣鴈鷺才擢於巖廊至於我后招賁林藪即金鏡於南面運璿樞於北斗總四靈為禎祥以萬物為芻狗將以天之靈命纘乎已躬國之盛烈在祀與戎乃詢訪太史總攬英雄金門曉闢御路

橫通隔歲梅花氤氲於帳殿迎春楊柳搖曳於離宮戈  
橫鐵騎旗常長虹疊靈鼓於流水引繁笳於朔風威單  
于而過代北祠后土而幸河東故致虔誠揀吉日甸師  
清野宗伯奉秩端旒垂綬左輔右弼修五禮之大道酌  
千靈之故實綵幣藻耀層壇峭崿黃琮展前以備陳白  
茅有藉而間出玄酒式降以尚本瑞珪不琢而貴質繁  
纓藻帶燦爛於祭容孤竹雲和鏗鏘於聲律鬱人獻爵  
司干授器據青野之雕阜肅黃祇之神位鼎氣歆雲神

光燭地魏珠映天子之輦汾鴈入大夫之輦薰風偃草  
以浹洽遲景暄空而明媚河圖所以無隱天寶由其不  
秘於是湛露沕涌羣后徜徉接武委贄述職勤王神具  
醉止降福穰穰包六合而布化橫萬乘而騰芳吾君終  
以守謙靜重賢良其儀不忒其言有章豈比夫魯蜡有  
乖仲尼聞而發歎漢祀多僻匡衡陳其用祥顧惟不才  
宅生帝道願候雲亭之事素懷封禪之草儻中人之見  
談賦上林之振藻

禋六宗賦

以享神精潔四氣叶和為韻

唐王起

王者稽祀典竭至誠禋六宗而欽若致四海之和平宗  
者以尊為稱禋者以敬為名爰是崇而是長必惟一而  
惟精則四序三光運有恒度水旱寒燠災無所萌上乃  
擇元辰留睿想萬樂備百禮往圭璧陳俎豆敬靈壇嶽  
立擁千官而式瞻天仗星陳睹一人之可象王食皓皓  
而方積珠旒穆穆而斯仰觀乎薦在有翼而有嚴貴其  
誠故來格而來享原夫禋於三辰天宗必降嘉薦是列



歆之以虔恭奠之以豐潔使兩曜合璧不為薄蝕之虧  
五星連珠詎有欃槍之孽其禋於四時也將以恤蒸人  
感明神使還周克序鱗次相循攷之於葭灰不愆於候  
調之以玉燭無奪其倫其祭寒暑也將以周萬類均二  
氣時當玄律無墮指以成災節變朱明曷流金之足畏  
其祭水旱也則天無作孽人獲大和祲魃不生乎災熾  
商羊自屏於滂沱相彼六宗皇聖是接戩穀降而肝鬯  
文物紛其睟睟聆夫管磬知律呂之克諧列彼苾芬信

幽明之允叶然後一德不二三皇可四地發嘉生天星  
上瑞授百神之職興兆人之利君子謂大舜之克禋惟  
我皇之能備

祠靈星賦

以工奏雲漢祈  
彼嘉穀為韻

唐闕名

祀有典兮惟敬天垂象兮在崇奉靈星之德祈嘉穀是  
豐乃命宗伯詔樂工徵舊典於祝史答嘉貺於玄穹以  
夫靈者降休祐星者燭宇宙況出應天田見彰農候足  
使野夫致享祠官敬授禮而有異豈霄縈之同登樂則

必倫乃絲簧之並奏於是驗星紀稽帝文觀農祥之晨  
正彰土膏之脈分奠玉盃於青帝用潔牲於白雲乃啟  
雲壇爰登玉瓚拜天貺之昭彰見星光之照爛列黍稷  
而馨感明靈奏和樂而聲聞霄漢瞻彼太極載乎紫微  
神之至兮雲映曖靈之降兮日揚飛列綴兆於峻舞徵  
歌頌於絲衣禮成文兮樂終變神胥樂兮儼將歸雕豆  
玉觴自殊器於宗祀青圭紺席乃叶禮於禳祈懿夫高  
祖建始福祿奚委禮用太牢名存漢氏皇家復位樂器

是備異晉皇之配饗因南郊而道弛禮容盛分在今時  
祀豐今邁彼且夫與衆祈禱曷不稱嗟溥天之惠罔不  
休嘉豈比夫賈生弔屈空祀三閭之水漢皇幸蜀虛禱  
萬里之沙者哉是知我禮有肅茲祀不黷告農可以勸  
躬耕祀聖可以厲浮俗固宜不害三時方成九穀然後  
覩觀澤之禮承屈天之福庶憑之而多祐覩觀秋成於西  
陸

南郊享壽星賦

唐

周 鈐

玉露初降金風正秋有壽星之發彩出離方而若浮太  
史於是奏時令贊天休謂三光之丕顯蓋萬乘之勤脩  
天子乃命有司灌鬱鬯登靈壇以嚴事敬南極而延望  
當其氛霧寢煙霞曠循大象之昭回見孤光之寥亮月  
來歲往常居赤帝之前目擊心祈空仰碧霄之上所欲  
精誠斯感盱衡潛交矚神靈兮心馳箕斗奠椒漿兮酌  
滿陶匏事異乞言殊養老於東序祭惟合禮同祀月於  
西郊時也陰陽正位晝夜平分思薦祉於人壽遂大享

乎天文則知秩天宗用郊祀斯祭也象在角亢壇當戊  
巳月皎皎而清漢波流夜蕭蕭而白榆風起齊心常潔  
蘋蘩之薦已申壽域光開龜鶴之年可俟祀事既道之  
南恍惚兮光臨俎豆依稀兮氣動煙嵐由是見星躔之  
不爽知君德之相參彼牛女迢遞以增思參商隱見而  
差失處圓靈兮徒分炳煥於敬授兮未為貞吉曷若我  
冠衆星而稱老當三秋而迴出既有補於乾坤詎廢書  
於時日是宜執犧象展難彛召馮相而司歷命祝史以

陳辭如此則所謂一人有慶兆民賴之

東郊朝日賦

以國家行仲春之令為韻

唐陸贄

日為炎精君實陽德明至乃照臨下土德盛則光被四  
國天垂象聖作則候春分之節時則罔愆順周官之儀  
事乃不忒於是載青旂儼翠華蓋留殘月旗拂朝霞咸  
濟濟以皇皇備禮容於邦家天子躬整服以待曙心既  
誠而望賒條而罷嚴更闢禁城五輅齊駕八鸞啟行風  
出郊而草偃澤先路以塵清卷餘靄於林薄動神光於

旆旌初破鏡而半掩忽成輪而上征果耀榮光分輝於  
千品萬類煙煴瑞色均燭於四夷八紘一人端冕以仰  
拜百辟奉璋而竭誠故曰天為父日為君和氣旁通帝  
德與日德俱遠清光相對帝心與日心齊明時也春事  
既用夾鍾律中登觀臺而瑞集覩芳甸而農衆東為陽  
位故出拜於國東仲居時中乃展禮於春仲既而盛禮  
畢陳錫鑾回輪家有罄室巷無居人備禮服之燦燦殷  
游車之辚辚人望如草我澤如春惟天德與聖壽配朝



日而長新伊茲禮之可持歷前代而脩之漢拜庭中成  
煩褻之細事魏朝歲首失禮經於舊時國家欽若天命  
率由時令矯前王之失德修古典而施敬俾伯夷之掌  
禮侔軒后以作聖恭承命於春卿遂觀光而興詠

東郊迎氣賦

以青陸朝覲陽  
和啟蟄為韻

唐闕名

聖人克崇祀典大啟皇綱布發生之新令遵迎氣之舊  
章於以式綏景福於以弘開化光南至生春送涸涸之  
玄律東郊展禮迎煦嫗於青陽於時太史陳詞歲發其

木天子乃警仙蹕熏黃屋蒼龍矯首以虛徐玉輅啓行  
而肅穆千官萬騎拱神位於中霄太皞勾芒扇和風於  
東陸明德惟馨蒼精降靈寒色尚留於壇墀淑氣已生  
乎杳冥少陽始來隨初日而其輝未赤新春乍應拂大  
旌而其色彌青天統則彰禮容斯覲樂聲動蕩於木氣  
黃道麗彩於蒼壁氣先四序克配於木德震宮光被八  
紘不逃於金壺玉厯迎之伊何神人以和明命既頒於  
執事遐邇必聞於賡歌時也韶景熙熙仁風習習日月

克符於躔次草木遂生於原隰施惠而穀雨垂恩發號  
而春雷起蟄其道孔昭其律已調禮展於斯且殊夫禮  
月之夕拜之於曉有類乎拜日之朝我后崇五帝之經  
教酌三代之典禮振六樂之鏘鏘列千官之濟濟八音  
已陳夫濩武萬祗既歆於壇陞夫如是者惟聖所符惟  
天所啟故迎氣之祀事正皇王之大體者矣

東郊迎春賦

以立春之日備  
禮東郊為韻

唐王起

我皇則銅渾而有倫應木德之惟新展東郊之盛禮出

左介而迎春所以先庚有秩舊典攸遵將欽承上帝而  
敬授於下人者也於是法駕鏗鏘嚴城翕習見太史之  
先謁知勾芒之已及都人士女候彩仗以駿奔文物聲  
明擁翠華而鱗集莫不聽玉漏而雷動起靈壇而嶽立  
於是闢重門遵九遠服蒼玉載青旗草木之萌必因茲  
而動矣原野之蟄亦自此而啓之展聖容之穆穆引天  
步之遲遲有嚴有翼不徐不疾百辟陪乘千官扈蹕遵  
皇衢而却轉度青門而迴出八鑾振響隨解凍之和風

五輅騰輝映麗天之遲日東郊之中肅穆會同俎豆莘  
莘而駭目衣冠濟濟而鞠躬祥雲為之郁霭佳氣為之  
蔥蘢青帝克禋必來顧而來饗玄穹廣覆何自西而自  
東當是時也四遐縱觀五服來備瞻聖皇之迴輪知太  
昊之整轡登臺者漸樂擊壤者咸遂莫不荷煦嫗於陰  
陽感溫仁於天地夫然則政行可以不夫根著可以漸  
苞異逆暑之吹幽室聞乎德肅於火殊迎寒於旁磔何  
足以禮行於郊則知和氣熙熙盛容濟濟必蒼龍之整

駕當青鳥之司啓握金鏡而明王道調玉燭而昭國體  
莫不在迎春之盛禮

東郊迎春賦

以天子率公侯  
共行事為韻

唐謝觀

玄冥之政已息青帝之令將行太史先三日以奏天子  
率千官以迎是知齊沐風興虔恭慎慄命奉常按東郊  
以嚴備詔金吾肅中禁以警蹕內外相比上下是率俄  
而斗轉招搖日當甲乙褫玄冕於殘漏掛青衣於曉律  
翠華忽舉見閭闔之初開蒼龍啟行與朝陽而對出觀

夫飛輦輅儼珠旒萬騎而前分儀仗千乘而後列公侯  
出青門之郊至祈神之地簣簴羅植珍羞有次陳靈威  
於中宮之座設太昊於配享之位東嚮西嚮勾芒歲星  
而並列左之右之三辰七宿以相廁既竭百辟之心用  
展一人之事帝乃玉色以進磬折而前求發生之候不  
忒祈溫和之氣罔憊盡敬於地冀祐於天一拜而北陸  
之寒去矣再拜而東方之風煦然獻酬既已尊卑備矣  
拂祥光於龍顏之上納和氣於御衣之裏鳳詔還闕金

輿反軌遂舉措而凝令載行隨指顧而發生四起我風  
有截郊祀無假於文王我化無為律呂不勞於鄒子故  
乃布德施政達達幽通高卑咸沐貴賤攸同始振蟄蟲  
在好生惡殺遂行慶賜可滅私徇公乃得化洽方隅恩  
光岐雍遵古典以立則授人時而敬用願迎乎千春萬  
春與夷夏之所共

青圭禮東方賦

以修舉春祀崇  
尚圭薦為韻

宋

文彥博

青惟五色之首圭乃六器之儔朝日之郊是薦迎春之



禮聿修結綠鴻輝既肅陳於震位出藍美質將仰奉於  
神休原夫穀旦前驅祲威具舉太史先春而必告宗伯  
庀職而攸敘青圭之秘寶爰資蒼帝之明靈可佇謂物  
生有象我則銳其質以協宜謂歲起於東我則係其方  
而得所無瑕可貴有美惟珍配其色表盛德之在木正  
其位彰與物以為春異雕楮之奇文琢工奚取倖翦桐  
之秀彩寅位斯陳詎止溫其寧專瑟彼成形自表於瑰  
器致用必先於瑟祀色斯舉矣俯玉案以相鮮禮以行

之背金方而致美豈不以標十德者圭為貴列四序者  
春是崇將順時而展禮故辨方而在東蔥蒨呈姿稟粹  
自輝山之石虔恭致薦逆釐從解凍之風然則為器之  
用不同禮神之功可尚名參有邸之義色異因方之狀  
縹華中秘生成之氣候斯迎紺綵外融溫厚之方隅相  
向懿哉享茲生物之主異彼迎秋於西神感而登禮必  
答時和而迓衡不迷用可重焉且異舜班之瑞文為貴  
也還殊禹錫之圭故得鴻覆降康大庭錫羨祈民福以

昭格授人時而於變蓋由以方圭總翠之美歟青郊而  
可薦

西郊迎秋賦

唐  
張秀明

彼玄天平分以成乎歲也惟日有令將法於王者服蒼  
玉而應春居明堂而順夏既隨時而有義皆率禮而無  
捨若乃律中夷則神司蓐收涼風以厲大火西流草木  
不芳誰忍聞於鷦鷯囹圄再繕亦申命於鷦鷯先三日  
而太史以謁率百官而天子乃遊然後天仗齊列野慶

清秋乘白輅而啟行載白旗而扈從天顏乃穆帝典攸  
重彼詞客與史臣咸作歌而陳頌既啟鑾輅爰居總章  
備水潦修隄防鴻雁將賓待橫舟於汾曲鷹隼已擊且  
較獵於長楊實惟道映三五何雷聲超百王而已哉別  
有原憲長貧仲尼少賤朝遊白社驚一葉之辭秋夜宿  
靈臺聚羣螢而燭卷既覩西郊之禮將述東山之禪欣  
庇影於禹陰願陳力於周諒

西郊迎秋賦

以題  
為韻

唐

馬逢

稽夫王者御極上法璿衡分五方以辨位察四時以作  
程節既云徂躬履端而御歷氣之將始必出郊以親迎  
然後人心不惑君德用明是時火官威寢金精氣淳有  
司來奏詰旦迎秋皇帝乃齋心以待曉御袞龍以垂旒  
俄而金闕戒辰司魚鑰以撒鍊玉漏將曉直難人以獻  
籌乘輿乃駕赫奕皇州天仗俟以雲合風旗閃而星流  
馳六飛以啟道騰八駿以夾輶祝三辰與七宿儼公卿  
與諸侯在位則其帝少皞配坐則其神蓐收我皇乃順

時候育黔黎佩白綬執白圭盛德在金就金方以歲事  
西成有望出國門以面西豈比夫簫鼓徒樂於汾水玉  
帛空朝於會稽誠農既罨酒縮靈茅笙鏞謁廟梁稻充  
庖日轉天旋既將歸於北極雲行雨霑匪空自於西郊  
是月也天地始肅秋冬將布勞我農民張我王度疑獄  
在斷命司寇而按囚徒遠方來賓發天兵而開武庫然  
後人畏威而自正俗知禁而刑措休祥異至則河湧靈  
圖慶賜遂行乃山呼聖祚於赫哉國容既備時令將徂

樂萬姓以雍熙總百川而奔注余亦願於賓王效武貴  
而作賦

北郊迎冬賦

以題為韻

唐王起

我皇審緹幕候玄英法天之序作人之程律變於冬必  
順時而冬命水盛於北亦隨方而北迎所以脩舊典闡  
鴻名受太史之先謁率羣辟而躬營況肅殺以北陸將  
昭宣乎上京於時時和歲豐勞農息力結冰於坎改火  
於國天欣玉燭之太和人受銅渾之罔忒由是文物成

聲名飾皇皇濟濟鏘鏘翼翼向仙蹕之駐方引旂於司  
南望曉星之殘尚建杓於禮北及夫禁城啟寒漏極分  
天仗而雲布遵皇衢而繩直嚴飭絕玄輅之響愛日動  
鐵驪之色一人由之而展容萬姓於焉而仰德既而臻  
靈壇薦嘉餽奠之以玉縮之以茅雖布政於玄堂以居  
乎左个而司晨者黑帝必祭於北郊蓋示敬於端冕非  
取樂於懸匏及夫整宸儀迴天步考時訓而咸若稽月  
令而畢賦導嚴凝之氣無奪其倫應廣莫之風不慙於



度則知北郊之為禮所以佐天而成功亦以感神而叶中故宜百神矜饗萬寓朝宗豈止運行而成歲閉蟄而為冬

大蜡賦

以暮冬律變新陽載動為韻

唐楊諫

大蜡之祭分所以饗田神賞農務陰律窮玄冬暮星迴於舊列日極於餘度必也介僎謀牲牲具狐裘以黃皮并以素蓋欲息田夫而褒歲賦夫搜索之謂蜡閉藏之謂冬具索也可以舉羣祀其藏也可以勞三農欲碩苗

而不害則迎猫暨於田鼠俾昆蟲之無作則祭坊與夫  
水庸以夫月建丑日在戌磔犧牲之體所以尚其腥登  
水草之殖所以貴其質詠豳詩以合雅擊土鼓以應律  
瑞穰穰芬苾苾百日之勤一日之薦或酬或酢既騰觚  
於無算為宮為徵方播樂於六變命清祀兮在殷復嘉  
平兮處秦繫率仁而終義實革故而迎新樂舉斯陶嗤  
子貢之來覲禮成而出美仲尼之為賓故聖人之舉事  
也務於崇勸戒敦否臧樹之瓜華告多藏者必覆致乎

女鹿示不德者斯止豈惟乎其儀抑抑其樂洋洋是以  
伊耆之禮不易大羅之職有常嗣歲將興或祈穀於上  
帝人才不匱或觀政於四方則知德厚者必祀功高者  
必載司嗇之祐維永瑞於我唐先愀之神豈獨見於前  
代故曰蜡也移萬人登百種可以志陰陽之變動

朝獻太清宮賦

唐杜甫

冬十有一月天子既納處士之議承漢繼周革弊用古  
勒崇揚休明年孟陬將攄大禮以相籍越尋倫而莫儔

歷良辰而戒吉分祀事而孔脩營室主夫宗廟乘輿備  
乎冕裘甲子王以昧爽春寒薄而清浮虛闔闔逗蚩尤  
張猛馬出騰蚪捎熒惑墮旄頭風伯扶道雷公挾輶通  
天台之雙闕警溟漲之十洲浩劫礪礪萬山颼颼臻  
於長樂之舍嵬入乎崑崙之丘太一奉引庖犧在右堯  
步舜趨禹馳湯驟鬱曾宮之律萃圻元氣以經構斷紫  
雲而扞牆撫流沙而承雷紛隳珠而陷碧燿波錦而浪  
繡森青冥而欲雨艷色炯而初晝於是翠蕤俄的藻藉

舒就祝融擲火以焚香溪女捧壺而盥漱羣有司之望  
幸辨名物之難究瓊漿自間於棗盛羽客先來於介胄  
爍皇祖之儲祉敬雲孫而及此詔軒轅使合符敕王喬  
以視履積昭感於嗣續匪正辭於祝史若肝鬯之有憑  
肅風颯而乍起揚流蘇於浮柱金英霏而披靡擬雜佩  
於曾巔孔蓋蔽以蜺纚中澁澁以迴復外蕭蕭而未已  
上穆然注道為身覺天傾耳陳僭號於五代復戰國於  
千祀曰嗚呼昔蒼生纏孟德之禍為仲達所愚鑿齒其

俗竄竄其孤赤烏高飛不肯止其屋黃龍哮吼不肯負  
其圖伊神器臬兀而小人訥喻歷紀大破瘡痍未蘓尚  
攫拏於吳蜀又顛躓於羯胡縱羣雄之發憤誰一統於  
亨衢在拓拔與宇文豈風塵之不殊比聰廐及堅特渾  
龍豹而齊驅愁陰鬼嘯落日梟呼各擁兵甲俱稱國都  
且耕且戰何有何無維累聖之徽典恭淑慎以允緝茲  
火土之相生非符讖之備及煬帝終暴叔寶初襲編簡  
尚新義旗爰入既清國難方覩家給竊以為數子自誣

敢正乎五行攸執而觀者潛悟或喜至於泣鱗介以之  
鳴簾昆蚊以之振蟄感而遂通罔不具集佇神光而甜  
間羅詭異以貳晉地軸傾而融曳洞宮儼以疑岌九天  
之雲下垂四海之水皆立鳳鳥威遲而不去鯨魚屈矯  
以相吸埽太始之含靈卷殊形而可挹則有虹蜺為鈎  
帶者入自於東揭莽蒼履崆峒素髮漠漠至精濃濃條  
弛張於巨細覲披寫於心胃蓋脩竿無隙而仄席已容  
裂手中之黑薄晚堂下之金鐘得非擬斯人於壽域明

返樸於玄蹤忽翳日而翻萬衆却浮雲而留六龍咸驚  
跖而壯茲應終蒼黃而昧所從上猶色若不足處之彌  
恭天師張道陵洎左玄君者千二百官吏謁而進曰今  
王巨唐帝之苗裔坤之紀綱土配君服官尊臣商起數  
得統特立中央且大樂在懸黃鍾冠八音之首太昊斯  
啟青陸獻千春之祥曠哉勤力耳目宜乎大帶斧裳故  
風后孔甲充其佐山稽岐伯翼其旁至於易制取法足  
以朝登五帝夕宿三皇信周武之多幸存漢祖之自強



且近朝之濫吹仍改卜乎祠堂初降素車終勤恤其後  
有客白馬固漂淪不忘伊庶人得議實邦家之光臣道  
陵等試本之於青簡探之於縹囊列聖有差夫子聞斯  
於老氏好問自久宰我同科於季康取撥亂反正乃此  
其所長萬神開八駿迴旗掩月車奮雷騫七曜燭九垓  
能事穎脫清光大來或曰今太平之人莫不優游以自  
得况是蹴魏踏晉批周抉隋之後與夫更始者哉

朝享太廟賦

唐杜甫

初高祖太宗之擲風沐雨勞身焦思用黃鉞白旄者五年而天下始一厯三朝而戮力今庶績之大備上方采龐俗之謠稽正統之類蓋王者盛事臣聞之於里曰昔武德已前黔黎蕭條無復生意遭鯨鯢之蕩汨荒歲月而沸渭袞服紛紛朝廷多閏者仍亘乎晉魏臣竊以自赤精之哀歇曠千載而無真人及黃圖之經綸息五行而歸厚地則知至數不可以久缺凡材不可以長寄故高下相形而尊卑各異惟神斷繫之於是本先帝取之

以義壬辰既格於道祖乘輿即以是日致齋於九室所以昭達孝之誠所以明繼天之質具禮有素六官咸秩大輅每出或黎元不知豐年則多而筐筥甚實既而太尉叅乘司僕扈蹕望重闈以肅恭順法駕之徐疾公卿淳古士卒精一黜宗廟之愈深抵職司之所密宿翠華於外戶曙黃屋於通術氣淒淒於前旒光靡靡而嘉粟階有賓昨帳有甲乙升降之際見玉柱生芝擊拊之初覺鈞天合律荀簾佗以碣磻于戚宛而婆娑鞀鼓塤簫

為之主鐘磬等瑟以之和雲門咸池取之至空桑孤竹  
貴之多八音循通既比乎旭日昇而氛埃滅萬舞陵亂  
又似乎春風壯而江海波鳥不敢飛而玄甲嶸嶸以岳  
峙衆不敢去而鳴佩剡爚以星羅已而上乾豆以登歌  
美休成之既饗璧玉儲精以稠疊門闌洞豁而森爽黑  
帝歸寒而激昂蒼靈戒曉而來往熙事莽而充塞羣心  
麋以振蕩桐花未吐孫枝之鸞鳳相鮮雲氣何多宮井  
之蛟龍亂上若夫生弘佐命之道死配貴神之列則殷

劉房魏之勲是可以中摩伊呂上冠夔禹代天之工為人之傑丹青滿地松竹高節自唐興以來若此時哲皆朝有數四名垂卓絕向不遇撥亂反正之主君臣父子之別奕葉文武之雄注意生靈之切雖前輩之溫良寬大豪俊果決曾何以措其筋力與韜鈴載具刀筆與喉舌使祭則與食則血若斯之盛而已爾迺直於主索於祊警幽全之物散純道之精蓋我后常用惟時克貞膺以蕭合酌以茅明蝦以慈告祝以孝成故天意張皇不

敢殄其瑞神姦安帖不敢秘其精而無絕軌享鴻名者  
矣於以奏永安於以奏王夏福穰穰於絳闕芳菲菲於  
玉笋沛枯骨而破聾盲施妖胎而逮鰥寡園陵動色躍  
在藻之泉魚弓劍皆鳴汗鑄金之風馬霜露堪吹禎祥  
可把曾宮歔歔陰事儼雅薄清輝於鼎湖之山靜餘響  
於蒼梧之野上窅然漠漠惕然兢兢紛益所慕若不自  
勝瞰牙旗而獨立吟翠駭而未乘五老侍祠而精駭千  
官逖聽而思凝於是二丞相進曰陛下應道而作惟天

與能澆訛散淳樸登尚猶日慎業業孝思蒸蒸恐一物之失所懼先王之咎徵如此之勤恤匪懈是百姓何以報夫元首在臣等何以充其股肱且如周宣之教親不暇漢武之淫祀相仍諸侯敢於迫脅方士奮其威稜一則以微弱內侮一則以輕舉虛憑又非陛下之恢廓緒業其瑣細亦曷足稱丞相退上跼天躋地授綏登車伊瀕洞槍鼎皆出為儲胥本枝根株乎萬代睿想經緯乎六虛甲午方有事於采壇紺席宿夫行所如初

封西嶽賦

有序

唐杜甫

上既封泰山之後三十年間車轍馬跡至於太原還於  
長安時或謁太廟祭南郊每歲孟冬巡幸溫泉而已聖  
主以為王者之體告厥成功止於岱宗可矣故不肯到  
崆峒訪具茨驅八駿於崑崙親射蛟於江水始為天子  
之能事壯觀焉爾況行在供給蕭然煩費或至作歌有  
慚於從官誅求坐殺於長吏甚非主上執玄祖醇醲之  
道端拱御蒼生之意大哉聖哲垂萬代則益上古之君



皆用此也然臣甫愚竊以古者疆場有常處贊見有常儀則備乎玉帛而財不匱乏矣動乎車輿而人不愁痛矣雖東岱五嶽之長足以勒崇垂鴻與山石無極伊太華最為難上至於封禪之事獨軒轅氏得之夫七十二君罕能兼之矣其餘或蹶踣風雲碑牌祠廟終么麼不足追數今聖主功格軒轅氏業纂七十君風雨所及日月所照莫不砥礪華近甸也其可愆乎比歲鴻生巨儒之徒誦古史引詩義云國家土德與黃帝合主上本命

與金天合而守闕者亦百數天子寢不報蓋謙如也頃  
或詔厥郡國埽除曾巔雖翠蓋可薄乎蒼穹而銀字未  
藏於金氣臣甫誠薄劣不勝區區吟詠之極故作封西  
嶽賦以勸賦之義預述上將展禮焚柴者實覲聖意因  
有感動焉為其詞曰

惟時孟冬百工乃休上將陟西嶽覽八荒御白帝之都  
見金天之王既刊石乎岱宗又合符乎軒皇茲事體大  
越不可載已先是禮官草具其儀各有典司俯叶吉日

欽若神祇而千乘萬騎已蟻略伯擬屈矯陸離唯君所  
之然後拭翠鳳之駕開日月之旗撞鴻鐘發雷輜辨格  
澤之修竿決河漢之淋漓彊天狼之威弧墜魍魎之霏  
霏赤松前驅彭祖後馳方明夾轂昌寓侍衣山靈秉鉞  
而踉蹌海若護蹕而參差風馭冉以縱巘雲螭蹉而遲  
轔地軸軋軋殷以下折原隰草木儼而東飛岐梁閃倏  
涇渭反覆而天府載萬侯之玉尚方具左纛黃屋已焜  
煌於山足矣乘輿尚鳴驚興儲精澹慮華蓋之大角低

回北斗之七星皆去居蒼山而信宿屯絕壁之清曙既  
臻夫陰宮屏衆肆兀戈鋌悉宰飄蕭蕭洵洵如也於  
是太一抱式玄冥司直天子迺宿祓齋就登陟駢素蚪  
超崩劣天語秘而不可知代欲聞而不可得柴燎上達  
神光充塞泥金乎菌菑之南刻石乎青冥之北上意由  
是茫然延降天老與之相識問太微之所居稽上帝之  
遺則颯弭節以徘徊撫八紘而黠黑忽風翻而景倒澹  
殊狀而異色同若褰祛開帷下辯宸極者久之雲氣蔚

以迴複山嘯業而未息祀事孔明有嚴有翼神保是格  
時萬時億爾乃駐飛龍之秋秋詔王屬以中休觀羣后  
於高掌之下張大樂於洪河之洲芬樹羽林莽不可收  
千人舞萬人謳騏驎跋跋而在郊鳳凰蔚跋而來遊雷  
公伐鼓而揮汗地祇被震而悲愁樂師拊石而具發激  
越宇遐陬羣山為之相峽萬穴為之倒流又不可得載  
已久而景移樂闋上悠然垂思曰嗟乎余昔歲封泰山  
禪梁父以為王者成功已纂終古嘗覽前史至於周穆

漢武豫遊寥濶亦所不取惟此西嶽作鎮三輔非無意乎頃者猶恐百姓不足人所疾苦未暇廢斯玉帛考乃鐘鼓是以視嶽於諸侯錫神於茅土豈唯壯設險於甸服報西成之農扈亦所以感一念之精靈荅應時之風雨者矣今茲冢宰庶尹醇儒碩生僉曰黃帝顓頊乘龍遊乎四海發軔匝乎六合帛有云得非古之聖君而秦華最為難上故封禪之事鬱沒罕聞以余在位發祥隲祉者焉可勝紀而不得已遂建翠華之旗用塞雲臺

之議矧乎殊方奔走萬國皆至玄元從助清廟歆歆也  
臣甫舞手蹈足曰大哉爍乎真天子之表奉天為子者  
已不然何數千萬載獨繼軒轅氏之美彼七十二君又  
疇能臻此益知明主聖罔不克正功罔不克成放百靈  
歸華清

大祀山陵賦

有序

明魏學禮

萬厯庚辰歲皇帝將有事於山陵宗伯以故事請曰展  
陵視寢永昭孝思每帝嗣統則斯禮稱焉主上光紹鴻

極八載於茲矣爰修緝典仰答神靈帝其念哉帝曰俞  
是惟朕衷厥俟典禮卜日考儀則秩宗其視厥載往欽  
哉乃以季春十有二日聖駕夙蹕兩宮聖母暨中宮皇  
后及諸嬪妃咸與以從再越日肇稱祀典長永昭獻景  
裕茂泰康九陵及章皇后景皇帝陵厥明上奉兩慈宮  
以旋后妃從詰朝而還宮禮也臣伏睹曠儀思揚洪美  
惟昔何承天有上陵篇未足以極其致乃造斯賦以仰  
頌萬一云爾其辭曰



皇明開天垂禩萬葉誕此神聖茂隆昌業紹九帝以駿  
弘邁三代而光華逮垂衣之八載將展祀乎山陵思神  
靈之在天超埃壘而崇登峻皇隴之巍峙實玉體之是  
憑悵儀刑之莫覲抒遐思而靡勝於是命秩宗稽懿典  
詢太卜戒雲輦逮行宮以待涖兮運嘉木以經營覆善  
土以清路兮望馳道之允平肅九門之環衛兮屬元侯  
之上卿拱淵穆之宸居兮夾萬雉之朱城乃吉日之既  
屆兮鑾輿夙以啟行闢長安之左扉兮歷輔權與璣衡

炳瑤暉於泰階兮睹斗緯之清明蔚戈鋌之先導兮抗  
霞采之幢旌錯五色以成章兮卷蜚颺而縱橫玉輅耀  
以融麗兮儼曲蓋之蔥蒨識鹵簿之威儀兮陽羲升而  
霧散兩宮皇母暨厥后妃東華東安宛見翟輦彼羣姬  
之捧乘兮粲綵裾之菲菲紛翼侍之服御兮載晻霭而  
交輝從官前行居守趨送駕次鞏華翩躚翠鳳既侍膳  
於慈闈朝昌平之羣衆詔奉車使馭蹕兮屯六師之如  
雲虎旅集其警嚴兮乃斗遠其相聞厥明至於天壽兮

翠華弭於感恩惟詰旦以行祭兮詣長陵以停綏御青  
袍以對越兮燎芳芬以焮吹列鼎俎興簋豆兮獻桂酒  
以陳辭思雄武之御世兮極神謨之飛宕控九宇以張  
弛兮齊弘功於肇創都燕甸以撫夏兮埽沙漠之翠帳  
振長算以詔後兮鬯神明以開亮惟聖智之建始兮繫  
繁祉之錫貺祭竟徹牲百官既出更設酒脯內祀靜謐  
兩宮中宮拜起齋栗聿愛敬之咸盡昭內外之若一惟  
永昭之二陵實肅莊之玄殿爰自仁而率親亦如儀而

躬薦獻景裕茂以及泰康章后景帝奕葉重光八陵迨  
遞親禋不違乃遣官以代祀僉緡丈之是詳觀聖制之  
有奕兮循弘邇之藝章肆經緯乎天地兮亦符協乎陰  
陽式邁發以選闕今朝百辟於明堂衍宗祊於萬載兮  
享血食以孔長纘祖德以恒思兮流祚慶於無疆荷天  
命之彌篤兮永丕式於四方

祭先河而後海賦

以王者行祭先  
務其本為韻

宋

歐陽脩

在祭者必有常典務本者貴乎不忘既先河而告備乃

後海以為常幣玉始陳恭視諸侯之瀆牲牢繼制方祀  
百谷之王探國典之舊文撫禮經之大者以謂河導其  
派本一勺而始矣海納其會實百川之委也祀容肅設  
必先有事於靈長望秩並修然後功歸於善下誠以決  
九川而分導括衆流而混并一則窮本而有自一則兼  
容而積成是用分禮章而異數昭祭典以推行命祀首  
陳始則出圖之所禱辭以設方祈紀地之名用能縉乃  
令儀昭夫重祭利萬物以斯善用五材而竝濟無文既

秩崇經瀆以領祀羣望繼行禱朝宗而用幣外則盡物  
中惟告虔既義取於源委乃禮分於後先一禱致誠必  
告榮光之涖大川並走嗣臨重潤之淵得非衆嶽肇乎  
一拳椎輪生乎五輅考厥初之攸在彰返始而為務亦  
猶文王之祀雖貴不踰后稷之尊齊人之事將行敢越  
配林之故是知河必居首取發源而肇茲海不自由  
積衆以成其導洪流而並注散靈潤以旁滋顧乃濫觴  
之因必有先也視爾委輸之廣然後從之異哉祭尚潔

誠禮惟思反將展報以為義必討源而自遠故夫三王之祭川必務其本

四海以職來祭賦

宋孔武仲

上聖孝至諸侯職揚當一人之奉祭罄四海以來王肅  
爾駿奔各職修方之舊翼如顯相用嚴肆祀之常夫惟  
承祖宗積累之休處廉陛崇高之勢尊其親也既重假  
廟大其禮也又當配帝化首正寧教流當世本至誠之  
恭愛可以感人極四海之欣歡入而助祭時也六服而

內五侯至前同姓異姓今各奉玉帛大賓大客今迭承  
豆籩並來享以悅懌咸侍祠而吉蠲造此闕庭錯八鸞  
於外屏盛其饌貢洽百禮於中天擇於大射則賓自得  
賢誓以常刑則臣無廢職辨其吉禮之掌同厥歡心之  
得儼若將事欣然獻力分行遞見居多振驚之容承命  
勤修皆有和羹之德誠以報本反始者神聖之美教尊  
祖嚴父者朝家之上儀在盛王之顯若格縣宇以承之  
故爾各備上服並承約軼所以周廟陳常美羣公之肅



肅湯孫致饗詠列辟之祁祁衆莫衆於侯方尊孰尊於  
君者大邦小國兮至自畿外美味和氣兮實於堂下共  
承上化參德遜於前書各盡臣恭協裸將於大雅夫盡  
九州之力致五福之膺殊免爵於西漢異責茅於召陵  
以極精禋之意用全孝饗之能薦牡惟時推至誠而茂  
對執燭有序贊大事以靈承噫德教所加惠心益著外  
易俗於蠻貊下感心於黎庶矧乎茅土分寵親賢同慮  
幸丁萃享之時孰不驩虞而來助



御定歷代賦彙卷四十九